

**MIC akan bertemu PAS untuk bantah pelaksanaan hudud**  
**Malaysian Insider**  
**April 29, 2014**

MIC akan bertemu pemimpin PAS segera bagi menyatakan bantahan mereka terhadap pelaksanaan hudud di negara ini, kata pengarah strateginya, Datuk Seri S Vell Paari (gambar).

Menurut kenyataannya, beliau menghubungi Timbalan Presiden PAS Haji Mohamad Sabu mengenainya dan PAS bersetuju untuk bertemu dengan delegasi MIC.

"Saya harap pertemuan bersejarah antara PAS dan MIC ini akan menjadi kenyataan.

"Sedangkan Palestin dan Hamas boleh bertemu, Amerika dan Iran juga boleh bertemu, apa salahnya PAS dan MIC bertemu untuk membincangkan pendirian masing-masing," kata Vell Paari dalam kenyataan itu.

Bagi anak bekas presiden MIC, S Samy Vellu, hujah beliau adalah mudah. Jika hudud dilaksanakan di negara ini, Datuk Seri Anwar Ibrahim akan direjam hingga mati kerana kesalahannya sebelum ini.

"Tetapi oleh kerana undang-undang sivil, dia mempunyai ruang untuk membuat rayuan dan akhirnya didapati tidak bersalah dan dibebaskan selepas menjalani hukuman penjara yang panjang.

"Isunya di sini adalah dia masih hidup untuk membuat rayuan," katanya seolah-olah hukuman hudud tidak mempunyai ruang untuk membuat rayuan.

Vell Paari juga berkata, jika tangan sudah dipotong di bawah hudud dan kemudian didapati dia tidak bersalah, "Anda tidak boleh sambung balik tangan yang sudah terpotong, tidak boleh kan?" – 29 April, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/mic-akan-bertemu-pas-bagi-bantah-pelaksanaan-hudud>